

朱子詩義補正

朱子詩義補正卷之三

方望溪先生著 門人高密單作哲編次

鄭風

緇衣

三章皆反覆以致其愛慕而首曰緇衣之宜則
宜者可以勸而不宜者可以懲矣。

大叔于田

服以駕衡而持轅上襄上駕也與雁行文對似
非上駟之謂。

清人

以春秋傳證之。然後知先王井伍邱乘之法。教孝作忠。諸善備焉。盖有田有宅之農民。各愛其父母妻子。見主將失意于君。則鳥獸散而歸其家。况能挾之以叛逆乎。自秦漢以後。用招延募選之兵。然後入伍籍者。類皆獨身無藉。素行不足。自託于鄉里。故將吏參以私恩。縱之淫掠。則逐帥叛君。如渴得飲。良民土著者。不得不屏息以從。馴至大亂。應募者少。則按戶籍以選丁男。

不教而戰。驅赤子于必死之地。不亦痛乎。井田不能驟復。則唐之府兵。明之衛所。乃百世不易之良法也。明塞外諸衛全家在軍者。家免一人內地衛所軍單丁者。復還爲民。

羔裘

非舍命不渝。不能爲邦之司直。雖贊美之辭。可使聞者怵然爲戒。

遵大路

序以爲思。君子理亦可通。蓋託言君子將去。要于路而執其袪。謂之曰。子無我惡。故國不可以

詩義補正

卷之三

莫

二

遽絕也。下章倣此。賢者不見禮于君而浩然長往。則必惡留者之言。而以爲醜。故曰無我惡。無我醜也。

有女同車

集傳謂與所奔之男子同車非也。玩其辭意。乃見車中之女而慕悅之。絕無旣得所欲而挾以同車之意。序謂國人追咎鄭忽失婚于齊。義似有著。曰有女同車者。國君嫁女。必以姪娣從。如華如英。乃想像之辭。爛其盈門之類也。將翽將

翔佩玉瓊琚言孟姜將與同車之女翱翔佩玉
而來歸也德音不忘忽雖辭婚而齊侯愛忽親
鄭之德音則不可忘也所以志忽失大援以致
喪位隕身之意隱然可思若以爲男女同車以
奔則將翔將翔德音不忘義皆無處

山有扶蘇

伯陽父謂幽王棄高明昭顯而好讒慝頑童衛
彪傒謂周高山廣川大藪也故能生之良材而
幽王蕩以爲魁陵糞土溝瀆叅觀之可得此詩

之義山澤宜生良材、喻朝廷宜宅賢俊也。子都子充之不見、喻賢俊之伏匿也。荷花出汗泥而不染、喬松經嚴冬而不彫、則扶蘇游龍亦必草木之貴美者。

狡童

朱子決此爲淫女之辭、以不與我食、非男女不宜如此暱近也。按周官稟人、共內外朝、冗食者之食。春秋傳、公膳日雙雞、同僚治事于公所、必常會食。此必心懷嫉惡而易期以相避也。

丰

衣與裳對、俱當作平聲、

風雨

小序世亂而君子不改其度、劉向曾鞏皆承用之、蓋風雨沓至而如晦、猶世之昏亂也、雞鳴在暗而思曙、猶君子居亂而思治也、君子不改其度、則世道可挽、故見之而心悅、如疾之去其體焉。

揚之水

朱子引戴記以兄弟爲婚姻之稱與終鮮文義不協詩人蓋遭兄弟之不類而戒以無信讒言以疏同氣也揚之水不流束薪喻門祚衰薄以起終鮮兄弟之義也骨月相疑必有讒人交搆其間故正告之

齊風

雞鳴

楊中訥曰、蠅有聲則不止于雞鳴矣、日有光則不止于東方之明矣、故末章曰、會且歸矣、皆驚疑其已晏也、月當作日、○予與也、度幾無與子以憎也、

著

余少讀著疑與鄭之丰衛之桑中爲類而非譏不親迎、親迎之禮、增本御輪三周先俟于門外、且跬步之頃而三易其璵、不惟無此禮

數亦非事之情

及少長見班固地理志然後得其徵蓋

此女所奔者非一人東方之日則奔之者非一

女也齊自襄公鳥獸行下令國中長女不得嫁

爲家主祠名曰巫兒至東漢之初俗猶未改故

當其時奔者亦若無忤于父兄受其奔者亦可

無憎于里黨

蓋惟聽其奔然後可
以安人情別天屬也

顯言而公傳

道之是以鄭衛之詩按其辭可知爲淫奔而著

與東方其事其辭與夫婦之唱隨者幾無辨也

國語稱襄公田狩畢弋不聽國政而惟女是崇

則還與盧令亦同時所作耳。齊之立國能強。由其民習于武節。而其後篡弑竊國之變。皆由女寵。其詩十篇。二爲遊田。六爲男女之亂。而冠以古賢妃之警其君。蓋齊之所以始終者。具此矣。孔子刪詩。事有細而不遺。辭有污而不削。以是乃廢興存亡之所自也。非然。則鄭衛齊陳之淫聲慢聲。胡爲而與雅頌並立與。

猗嗟

龔纓曰。以禦亂兮。辭義凜然。蓋責其何不用以

復讐討賊也 末章

魏風

觀首二篇則知公室宗族褊急而無禮。觀末二篇則知卿尹有司貪暴而不仁。是以行者則勞于征役。不得養其親。居者則困于誅求。不得安其土。其隱者則懷憂而莫告。其仕者則懼亂而思閑。十畝之詩。似感于桃園而作也。○魏風非既併于晉之詩。觀伐檀碩鼠可辨。晉自曲沃桓叔以好德爲國人所附。至于武獻方務撫輯其民而用之。豈肯使之失所而永號。所云樂土樂

郊未必非望、走在晉也、觀唐風旣見君子、云胡不樂、我聞有命、不敢以告人、可見

葛屨

國風首篇多言公室之事、象拂非群、下所敢佩也、末章

園有桃

此賢士處隱憂在位者之無良而無可告語也、所謂彼人、卽伐檀碩鼠之所刺也、古者庶人謗、士傳言、故鄭人遊于鄉校、以議執政、而道微俗

敝人多溺于習見。轉以持祿榮身者爲是。而以
囂囂自得。泥塗軒冕者爲驕。正言不諱。憤時嫉
俗者。爲責人無已。所以失其是非之心者。以不
知其可憂。所以不知其可憂者。以未思政敗民
流。則亂亡隨其後耳。

陟岵

三代前無子別父母之詩。蓋孝子仁人不忍一
夕離親而宿于外。至以征役遠行。則睽隔之傷。
意外之慮。有不忍出諸口者。故必待辭家就途。

之後始自言其瞻望之情也不言已慮父母之疾痛衰羸但言父母閔已之勞瘁懼已之棄捐隱深悱惻之至也曰止曰棄者體父母之心不忍正言子之死但恐其久止于外或見獲而棄在他國耳于兄始正言之

伐檀

此亦刺貪之詩與碩鼠相表裏首二句言用力之艱而置之無用之地也河水清且漣猗喻魏地之貧薄也乃呼而問之曰爾不稼不穡何以

取我之禾三百廛乎爾不狩不獵何以瞻爾之
庭有縣貆乎治人者食于人以貧薄之地竭力
以奉爾望相恤也而爾不我恤獨不聞君子之
不素餐乎言彼者諷此人之不然也三百廛三
百億三百困乃下所以奉上若自食其力不宜
言數如此其多且于禾曰取則爲取于下明矣
古者民風淳厚田獵獲禽必獻于上豳詩所謂
言私其獫獻豸于公是也

碩鼠

直正也、小人農力以奉上而安享其餘、乃民之
正道、然必君明而吏良、然後得安其正道也、
二章

莫我肯勞、言不肯勤民事也、
三章

唐風

綢繆

此亦時有其事而聞者代爲之辭非其夫婦果有是語

葛生

首二句言物各有託如室家乃人所栖止也而予所美者乃不能栖息于此不知與何人曠然獨處于外乎獨處言離室家東山之詩所謂敦彼獨宿是也征役必有儕伍故曰誰與獨處若

自言誰與而獨處于此恐非女子所宜

采苓

爲讒者必曰吾以益汝也聽讒者必自謂有得也然無實之言信之動則有損果何所得哉

秦風

車鄰駟騶

周官司士掌擯士者、大僕出入王之大命、掌諸
侯之復逆、小臣掌王之小命、三公孤卿之復逆、
御僕掌群吏之逆、庶民之復、書曰、其侍御僕從、
罔非正人、秦則首變周禮、而司士大僕群僕之
職、以寺人領之、文王之興也、不獨髦士奉璋卽
兔罝之武夫、皆可爲腹心、好仇、秦則以媚子從
狩、輜車載獫狁、其不貴禮義而尙武健、不任士人

而親群小。自立國之始而已然矣。及其亡也。釁卒起于游獵。而禍成于奄尹佞幸。孔子編秦風。不首小戎蒹葭。而首車鄰駟騶。所以志其本俗。爲後鑒也。

蒹葭

或曰。此當從舊說。爲秦民思周而作。亦山榛隰苓之意也。西周忠厚敦大之俗。一旦變以秦法。而有剛勁嚴急之象。猶露變爲霜。而蒹葭之色。應之蒼然也。所謂伊人。在水一方。是時周在伊

洛也。遡洄從之，道阻且長。豐鎬之盛，不可仰追也。遡遊從之，宛在水中央，不忘先王之遺德。而思及後王也。白露未晞，白露未已，政俗雖變，而先王之遺風猶未泯也。

無衣

豈曰無衣，言衣裝皆風具也。戎事均服，故曰同袍。非彼此共服之謂。秦逐西戎，乃天子之命，故曰王于興師。雍州之民，天性義勇，文武成康之德在人。平王不能自用，而坐委于秦，以撥其本。

根惜夫○曲沃莊伯代鄂侯之喪平王使虢公將兵伐莊伯曲沃武公弑哀侯及小子侯桓王使虢仲伐武公呂氏引史記以責平桓獨闕二事豈欲自伸其說而削之耶東遷以後王室衰弱欲正莊伯武公之罪而不能桓王伐鄭師敗身傷則未可以無志責桓王也季孫斯仲孫何忌帥師則郈費可墮公圍成而公斂處父逆命雖孔子無如何但使周孔處此則必明正其罪務德修政終致天討而莫之能遏耳

陳風

東門之池

晤當從箋訓對

墓門

惟此詩爲陳佗而作情事甚合棘惡木也陳桓公方疾而佗殺其世子則同惡者必實繁有徒譬如荆棘叢生宜早尋斧柯託興于墓門俾其君惕然爲身後之慮也佗之無良國人莫不知而君終不寤養成其惡者自昔而然是誰之過

哉次章墓門有梅見爾時非無良臣可倚也而有鴉萃止亂賊羽翼既成故不得已作歌以告倘更置而不顧必至于顛倒乃思予言耳此詩宜作于陳桓公未疾以前豈卽以此詩獻如周公之以鴟鴞遺王與

防有鵲巢

据首章似言鵲不宜巢于防之早若不宣生于邛之高以喻譎張爲幻甚切特次章之義難通首章

或曰、廟門無事不辟、有事則修除、庭除旣塤之、後不宜復有甃、以文義推之、則鵲亦不宜于邛、與茗同、二章

澤陂

于所私之女而見爲儼、猶俟人于城隅之女而見爲靜、人心蔽惑、遂至于此、

于所慕而稱美人、男女所同、此淫女思所悅而不得見也、碩大且卷、碩大且儼、乃女悅男之辭、首章

檜風

羔裘

嚴華谷曰。大夫諫而不聽。故去之。雖去國而不忘君。故言我豈不爾思乎。實思之而勞心忉忉也。此說可從。

隰有萇楚

上有逍遙翱翔之君。則民窮于無告。財匱而莫支。所以自嘆其不如草木之無知也。

匪風

檜亡于東周之初。此詩宜作于厲王之世。與變雅相參。其義始見。蓋厲王之世。貢重役繁。威命時出。小國尤不勝其困。亂形已在人心目間。故中心慘怛。如風驚車。僨也。大東顧周道而出涕。桑柔哀靡國之不泯。苑柳嘆上帝之甚蹈。九服離心。故願周大夫奉使而西歸者。告王以撫馭庶邦。當懷之以好音。不宜困之以虐政耳。

曹風

蜉蝣

國風首篇多言君夫人之事。檜之羔裘。良臣旣去。而憂其君也。曹之蜉蝣。則將去而自明其志也。以于我歸處知之。蓋諫而不從。明知危亡。將及。徒憂無益于爲臣之義。惟去位而居處爲安耳。歸稅謂脫駕于田野也。

候人

首章似宜作賦。蓋謂才德無以異人。只可給役

事之小者。如候人之荷戈與被是也。而彼其之
子乃纍纍而服卿大夫之服乎。敷陳其事而直
言之。無比興之義。

鵜不在水而在梁。處非其地。不濡其翼與味。失
常道也。喻小人處非所據而失其常道也。次章

三章

豳風

七月

先兄百川曰。人君當愛民如子。而地勢隔遠。或漫不相關。故特陳豳之舊俗。民愛其君。不啻父母。則先王先公。所以教養撫循者。不待言矣。人君玉食萬方。視爲當然。或忘其所自。故具言一絲一粟。無非耕夫織婦。終年竭蹶而成。人君一日萬幾。或見爲煩苦。而思自暇逸。故覩縷民間耕稼蠶桑。師田力役。樵蘇茨蓋。閭扇堽塗。無一

日得自休息。故陳鹵風以感王恤民勤政之心。作無逸以示王保身省愆之要。自古陶成君德。無若周公之慮詳而心苦者。雖卷阿公劉召誥所云。未能若斯之懇至也。至用以逆暑迎寒。使小民朝夕歌吟。觀天星物候之變。則及時興事。而不敢自安。念豐衣足食安居之由。則戮力操作。而不以爲苦。且爲裳爲裘。私豨獻豸。則教以事上之禮焉。春酒介壽。則教以養親之誠焉。躋堂之祝。則教以忠君之義焉。朋酒之饗。則教以

睦族合嫺善鄰之道焉。至于蠶桑績饁畜聚果
蔬。則因以彰婦順教女貞焉。所以勞來匡直輔
翼而使自得之者。皆具于是矣。又其事淺近。其
辭顯易。雖冲幼之主。皆能諷耳而動于心。閭閻
婦孺。皆可傳說而知其意。其義本于九歌之勸。
而感入之心。較之洪範之敷言。更切以著矣。
殆及公子同歸。女公子也。春秋傳。圉人犇自
墻外。與女公子戲。文
王時。夫人躬采蘋葛。則豳公之女。未有不躬桑
者。故衆女見之。而悲以爲公子。于歸之期已亦

將出室而遠違父母也。或貴家大族之女當勝于公子而偕行者、或庶人之女年齒與公子相近者、皆因見公子之躬桑而有動于中、若謂當嫁于男公子、不惟非女子所宜、自忖于殆及同歸、文義亦不協。次章

柔桑謂葉之初生者、蠶始化惟食柔桑、所用不多、故女自持筐而手掇之、及其盛長、則所食不獨柔桑、必科別其條、盡取以備用、其遠揚而難于攀取者、又必伐以斧斲、仍益以不可條取之

女桑其事各異故分別言之

首章舉衣褐而後獨詳于蠶事者麻葛天成功
惟績縷而已若蠶之息耗則惟視女功之勤惰
且布褐黎民所服而帛以養老奉公故詳其事
以爲勸也 二章三章

後世織文皮貢亦出自民間而縹緗于貉之時
卽念及公子之裘裳則其風邈不可得矣○在
禮惟田與追胥竭作故曰二之日其同載績武
功 四章

或曰斯螽莎雞別爲二物七月在野以下乃言蟋蟀按蟋蟀望秋吟似七月始氣化而生者亦可通古者民受五畝之宅二畝半在田二畝半在邑塞向瑾戶蓋將徙居邑中而次年春夏始處此田中之室也惟改歲乃處此故曰入若見處室中卽文義爲不順矣王方若曰淮泗間農民有宅在城者近冬塗塞中田之廬門巷而去春夏始入居之塞向瑾戶改歲入處則中田之廬也于茅索綯亟其乘屋則邑居之室也

酒之作祭祀之外莫先于養老故首言介壽其次則賓燕故繼言朋酒之饗至于躋堂稱觥則非禮之常經惟幽之故俗有此故末始及之又此篇言衣言食皆終于奉公所以志其忠敬之誠也不及祭祀者庶人所薦卽飲食之常也○蘇氏藏冰以節陽氣乃無稽之談冰之出入乃物理人事之自然也十二月鑿冰至是始壯也正月納之間有冬煖凍閉不密而春始嚴凝者故以畢入之期言之也春秋傳曰在北陸而藏

冰、謂十一月、蓋天地嚴凝之氣、盛于此三月中、
候之不齊。早則十一月已凝、遲或正月始畢、而
常候則在十二月也。二月啓冰、蓋前此隆寒、賓
食喪祭、俱無所用之也。火出而畢賦、蓋春夏之
交、癘疫將作、至是而國之老疾、無不受冰、非爲
節陽氣也。周官凌人職、夏頒冰、通夏三月言之。
蘇氏四月大發冰之說、亦未知何據。
卽以其說推之、四月陽盛、以冰節之、猶可通。十
二月微陽、蘊伏于下、惟恐其不盛長、何故反納
冰地中、以解之哉。○陽氣之在天地、猶火著于

物故常有以解之、數語尤謬、陽者天地之盛德、
氣也、所以爲發育萬物之根本、萬物非得此不
生、朝絕則夕槁矣、稍衰則漸萎矣、近取諸身、火
之薄于邪氣、無根而妄發者、乃害于人、若本然
之火、則陽氣也、人之所恃以生也、培之猶恐其
衰、乃畏其盛而思所以解之乎、蘇氏論事多滯
于一隅、而于陰陽之本尤無窺焉、雖朱子所取
猶紕謬若此、他可知矣、末章

二章至四章言衣裘以禦寒、五章室屋戶向因

詩義補正

卷之三

四

三

七

戒寒而及之也。六章七章言農收疏材之積。八章因言羔羊朋酒公私渥洽皆飲食之事也。四章因取狐狸而及豸豸七章因播穀而及乘屋語雖側出意則牽連立言之序如此。

首章言小民自營衣食之難。然所衣不過布褐而已。其載績也則曰爲公子裳。其于貉也則曰爲公子裘。所食菽粟以外不過瓜苴荼蓼之屬而已。而其獲禽則曰獻豸于公。其稱觥也則願君之壽。考所居不過堊塗蓬茅而已。而築場納

稼之隙宵旦靡寧其乘屋也必先之以上執宮
功民之戴君皆知爲義所當然且動于情之不
能已俾矇瞍日誦于前卽中主聞之亦將惻然
有隱矣又掌以籥章用以逆暑迎寒通八蜡息
老物使蒙士誦之而徧播于鄉閭其采蘋也則
曰女心傷悲蓋愴然于父母之將離也其爲酒
也則曰以介眉壽蓋惕然于忠養之宜急也其
滌場也則曰朋酒斯享蓋衣食粗具而憬然于
親睦齒讓之宜敦使田間士女耳熟而心惟則

所以厚人倫而美風俗者莫此爲切矣

鴟鴞

群儒謂此詩作于管蔡旣誅之後皆以旣取我子爲據非也以尙書金縢考之則此詩作于未迎周公之先而蔡仲之命曰乃致辟管叔于商是東征克殷乃戮之于其地也成王執書以泣卽日出郊以迎公則公避居東郊百里內之近邑明矣惟作于未迎之先故曰旣取我子謂誘致管蔡以謀亂也其曰鬻子之閔斯蓋痛管蔡

自絕于天。終爲王法所不容。以大傷文考文母之心焉耳。若旣誅之後。則當曰旣戕旣賊。而不宜曰旣取矣。又謂成王幼未能行事。故周公攝政。若避而居東。成王已能臨政二年。何待周公歸攝。更非也。周公雖避。二公畢毛咸在。王政何患不行。所以伐殷之命。遲之又久而後發者。以王疑未解。友邦君越尹氏御事庶士。又以艱大民不靖爲疑。故二公亦未敢專。至周公旣歸。然後大誥天下。帥師東征。至商都而誅管蔡。又伐

奄以靖東夏三年諸事畢定而後歸耳若此詩作于管蔡既誅之後則亂已畧定何風雨漂搖之懼王已感悟又何以云未敢誚公哉

二章與末章意正相應二章自原所以獨操國事畧不自嫌欲及陰雨之未至而綢繆牖戶耳不謂牖戶未完而風雨已至大懼家室之漂搖而王心不悟屏身在外無所施其力則維音嘒嘒自鳴其哀厲而已流言之人謂公將不利于孺子欲貳公于王也而公之詩曰我室曰侮予

曰。予未有室家。曰。予室翹翹。宗臣體國。不敢自貳。而亦因以悟王也。

東山

此詩。但言室家男女之情。而無一語及其父母。采薇亦然。蓋征戍者。聖人之所不能廢言。及父母。則行者。難以自處。其心而上之人。亦有不忍出于口者矣。惟杖杜之勞。還役探其室人之情。而曰。憂我父母。則作忠教孝。其義更深。然戍守期月而代。猶可言也。征行三年。則子歸而不見。

其父母與父母不見其子者必多矣故養死事
者之老與其孤及春秋饗食載在周官而弔死
問傷周官王弔士庶子大司馬相則不忍以入
于詩辭也四牡之篇于將父將母三致意焉蓋
四十而仕五十爲大夫則父母必耆老雖役不
逾時而所切心者莫過于此故旣歸而反覆以
達其意焉

曰東山而不名其地何也春秋傳武王克商蒲
姑商奄吾東土也蒲姑齊地奄在曲阜魯地師

行不入國邑。必駐于龜蒙。鳬繹岱畎之間。遷徙無常。又三年之久。或巡宣他國。不可以指名何地。故統之曰東山耳。

征人淹久于外。反忽忽不覺。一旦曰歸。則喜極而悲生。首章

不言不見婦子之久。而言不見苦瓜栗薪。征人遠歸。觸物生感。徃徃如此。三章

破斧

湯之伐夏。亳人曰。舍我穡事。蓋其事初見。尙未

能深晰乎湯之義、不知其畏上帝而不敢不正也。周公東征、軍士皆曰：「四國是皇，蓋其德素孚，眾已久喻乎公之心，知其哀斯人而不得不正也。」破斧缺斨而曰：「哀我人斯。」以是知說以犯難、民忘其死、而人之欲義有甚于生也。

伐柯

玩其辭義，似王既迎公，周人喜之而作也。首章蓋追叙公方出避，國人憂疑之情。匪斧不克，喻大難方夷而猝起，非公之才德不能保世靖民。

也。匪媒不得喻君臣有間，冀有從中解釋而作之合者也。次章則喜得所望之辭，其則不遠，謂公之所以事嗣君，觀所以事前王者而可見也。籩豆有踐，喻君臣一德一心，萬事皆得其序也。或曰：亦寓不喪七鬯之義。朱子以篇次破斧之後，故定爲東人之詩，而情事不類。或周人作于始，迎公歸之時，而編錄失次，或作于公旣出師之後，而追叙其情，皆未可知也。

九戩

無所如風止雨霽雲無處所之所言倏忽不可得而見也。二章

孟子稱周公伐奄三年討其君非六師之盛不能壓其城而急攻之亦非奄有險阻可憑負固而不能克也文王三分有二德教獨未漸于東夏故殷之渫惡民染于商辛之暴德者不能自安其善良又緬思殷先王之遺澤而不忍背故武庚三監因之以倡亂周公東征雖震之以武威而實欲喻之以德義故駐師徐究之間庶邦

之保疆以俟王命者。則教告之。其阻兵安忍者。乃戰要囚之。多士所稱是也。至于三年之久。東土士庶咸喻乎周公之志。而惟恐公之西歸。則奄亦不能自固矣。然後正其君之罪。而簡別殷民之淑慝。其尤難馴者。則使其長帥之以遷于洛。聖人之師所至如時雨。而無後殃。惟其始之終之一歸于仁義而已。其後奄人復畔。成王滅之。不勞而定。以東人皆心饜周公之德。而蔑與同惡耳。故因定魯封。使殷民六族輯其分族。將

其醜類以法則周公皆原于此

狼跋

劉氏曰公孫幽公之孫周公也

朱子註大雅既醉篇周稱王而

尸但曰公尸蓋因其舊如秦已稱帝而其男女猶稱公子公主于文王時稱公子公孫者舊

矣故國碩膚言其德器之深宏也周雖王周之人因之

父老尚謂此我幽公之孫疑此亦公既歸而周

人美之非東人所作

首章

四國流言王亦疑公衆皆不知罪人之所在使公所以處此者不止于至善必不免令聞之有

傷矣。至風雷感而王悟，商奄定，王室安，公歸于
豐鎬，然後周人歎公之德音爲不瑕也。次章

鴟鴞東山，周公所作，不可係之魯，其體風也不
可以入雅，故附之豳風，以公固豳公之孫也。破
斧伐柯，狼跋，皆周人之詩也。伐柯喜王悟，公歸
而宗社復安，故曰我邁之子，遵豆有踐，狼跋喜
公西歸，而君臣譽處，故曰公孫碩膚，德音不瑕。
惟九罭乃東人所作，不宜入豳，豈魯無風，僅此
一詩，秦火之後，編者以其不可入頌，又所言乃

周公東征之事而因以其類附與

朱子詩義補正卷之四

方望溪先生著

門人高密單作哲編次

小雅

鹿鳴之什

鹿鳴

首章曰示我周行。次章曰君子是則是效。而末章曰以燕樂嘉賓之心。蓋人君之於賢者。求其善言。則如不得聞。師其德行。則如將不及。然後奉之以幣帛。將之以酒醴。始足以燕樂賢者之

心若駕馭以權術。縻繫以爵祿。言不敢盡其誠。道有所屈於己。庸鄙之夫。或奔走焉。豈足以致賢者之心而盡其力哉。○尊之爲嘉賓。宴之以樂歌。將之以幣帛。飲之以酒醴。所以盡群下之情者至矣。而所以望之者。則曰示我周行曰德音。孔昭曰。視民不忼。則凡出言之無章。令聞之不宣。威儀之不類者。周旋於琴瑟笙簧。篴篥樽俎之間。必有愧怍而不安者矣。故必平時不愆於德義。然後臨事能盡志於禮樂。此先王之以

善養人而德威惟畏者也。蓼蕭曰其德不爽曰
宜兄宜弟。湛露曰莫不令德。莫不令儀。義皆如
此。

德音者。德輝之著爲聞望者也。惟平時德音孔
昭。然後敷陳正道。能使人君敬信。正其威儀。可
使人君則效。民亦望其容貌。而不生慢易焉。非
實德素孚。而勉強矜飾於耳目衆著之地。則論
雖篤而不足以格君。色雖莊而不足以視民矣。
○次章終之曰以敖。蓋惟有德之君子。雖燕私

言詩卷二
敖遊而容貌辭氣皆可下儀其民上格其君此
卷阿之詩所以告王以頤頤卬卬令聞令望也
四牡

鹽以文義測之當作堅固言王事尙未堅固故
不遑自恤其私也

末章重言將母蓋父教子以義方子雖欲諗父
必止之惟母則篤於私恩故或慮其抱情莫達
又或無父而獨有母情尤可矜故宣之使自言
耳使臣旣還而燕勞之詩具此何也按聘禮兩

國君喪皆入境則遂未入境則返是父母有疾在塗亦可以告於君而更使命也必前此未定此制會有不敢告而遭喪者故特見於樂歌使後以爲式其不於遣使之詩何也方出而言此則恐傷孝子之心○聘禮使臣始出釋幣歸釋奠並於禰廟蓋列國交聘必以卿五十服官政則父母必篤老矣必無父母而後承使故皆於禰廟也王朝下聘不過大夫群士則具父母者多矣故勞還之詩諄諄及此春秋王使至魯多

公卿衰世之過禮耳、

皇皇者華

周官小行人使適四方、凡萬民之利害爲一書、其禮俗政事教治刑禁之逆順爲一書、其悖逆暴亂作慝猶犯令者爲一書、其札喪凶荒厄貧爲一書、其康樂和親安平爲一書、豈惟十有一年、王將巡守、小行人先適四方爲然、卽卿大夫時聘問、問道路所經、皆宜咨訪、歸告於王、以紀其政教、故此詩後四章、諏謀度詢、並以周勅之、

而首章每懷靡及、正惟恐其不周、而駢駢征夫、
凡在行者、皆宜同心協力、以張其職也、豈惟王
使、卽方嶽同盟、庶邦交聘、所經之國、札荒貧厄、
亦宜共分其災、犯令陵政、亦宜預爲之脩、故侯
國之勞使臣、亦用此爲樂歌、春秋傳必咨於周、
註謂咨於忠信之人、義尙未當、○首章亦可作
賦、蓋高原下隰、使者之所經也、草木榮華、使者
之所見也、故於策遣之辭及之、

黃琰曰、諏謀度詢、再四言之、正見每懷靡及、

常棣

燕飲之樂歌五其四篇皆悠裕和平惟此詩哀厲使人心惻以周公遭兄弟之變故不覺其情之蹙言之悲也死喪則相求患難則相急外侮則相禦凡有兄弟者皆然而公所遭則反是故自痛之深而切指死亡危難之情事使安寧無事者是寃是圖而信其誠然也人情於朋友則各從所好於妻子則各暱其私故視兄弟轉汎汎然獨不思召延朋好孰若兄弟怡然一如童

稚其情更親乎。私室相懽。孰若兄弟無間。薰然成和其樂可久乎。此又隨時隨事。感發其本心。而使之寃圖也。○或謂管蔡之誅。周公宜使二公主之。不知旣以大義滅親。又假手於他人。以避其名。非天理也。觀六章七章。則知公雖身致太平。以呂召畢散爲之友。以禽父之象賢爲之子。而於管蔡之事。則終身蹙然抱無涯之痛矣。禮兄弟之仇。不反兵。交遊之仇。不同國。同室之親。捍禦外侮。雖敵者以爲宜。朋友則情勢有隔。

矣。聖人之言皆盡乎天理之極、非以朋友爲不足重也。三章

伐木

鹿鳴之外復有此詩、蓋彼以燕群侯及公卿大夫、此則以燕王族之無服者、外姻之無職以及少與同學之士、周官所謂故舊是也。常棣之詩則專以燕王服內之懿親、

鹿鳴四牡皇華、君臣父子之恩義備矣、

鹿鳴人君禮下

臣之誠皇華人

常棣兄弟夫婦之恩義脩矣、伐木

朋友之恩義備矣。人倫之明本於君身而宣於
在朝之士大夫。然後庶民則而象之。故以爲燕
饗之樂歌。○取友必求勝已者。自鄉國而天下
每進益上。出谷遷喬之義也。○朋友之交易至
凶終隙末。故當飲食燕樂之時。而要以神聽。願
其終無乖戾也。首章

此燕朋友之詩。而舉諸父諸舅兄弟。何也。凡三
黨屬踈。而以志趨之同。術業之近。相往來者。皆
有朋友之道也。

吝於乾餼、以致得過於朋友、亦人之失德也、乃
自檢之密、非輕以量人、末章

天保

多益、如讜言之時入、庶政之日釐、皆是也、惟天
降之福、然後有此、首章

俾爾多益、以群下所效納言、罄無不宜、以君上
所措施言、凡此乃福之所以日新而悠久也、二章
五禮惟祭祀爲吉、蓋國家無事、君無喪疾、春秋
時享、君臣盡志、以從事於宗廟、人事之吉、莫大

於此。故此詩與大雅既醉之篇。皆以爲祝嘏之辭。而此詩推本於群黎百姓之徧德。蓋未有不
能成民。而神降之福者。既醉則祝願子孫妃匹
之皆賢。蓋子孫不賢。則景命無所附。妃匹不賢。
則子孫無所式矣。此群臣之辭也。故以群黎百
姓爲本。既醉父兄之辭也。故以子孫妃匹爲重。
義各有當也。四章五章

尸在廟中。則全於君。以象先君。故謂之君。君曰。謂尸傳神
意也。四章

此詩前後言天之降福，皆祝願之虛詞。惟五章言降福之實，蓋天下之民各遂其生而從上之教。人君之福莫大於此。洪範惟時厥庶民于汝極，錫汝保極。卽此義也。不曰民興於德而曰徧爲爾德者，非實德具於君身，安能徧喻於群黎百姓哉。

五章

日月所以照臨也，山嶽人所瞻仰也，松柏人所蔭賴也，無不爾或承。總承上五句。天下莫不承奉，則天之保定人君者至矣。與抑詩萬民靡不

承義同。○三章祝國勢之盛昌。此章祝王躬之
壽考。故並言山。而其指各異。○黃琰曰。三章言
受福之盛大。卒章言受福之永久。末章

采薇

采薇出車枕杜。序以爲皆文王之詩。朱子不從。
而定王爲周王。蓋疑出車之首章曰。自天子所。
謂我來矣。似不可以爲自紂之所而來也。不知
紂方以威武臨諸侯。玁狁西戎不靖。必以征討
命方伯。紂卽無命。文王亦宜請命。故言自天子

所命我出師而來郊牧。又曰：天子命我，城彼朔

方。卽五章所謂畏此簡書是也。春秋傳：管仲言於齊侯曰：請救

邢以從簡書可徵當時孔子稱文王三分天下皆以天子之命爲簡書。

有其二以服事殷。此三詩及春秋傳文王帥殷

之畔國以事紂，乃其明徵也。如以王爲周王，則

武王伐商，戎羗已役屬於周。克商之後，九夷八

蠻罔不率服。獫狁豈能復爲寇暴，使征戍之民

靡室靡家而誓衆之詞歎多難之棘乎。○詩所

叙次，似春戍而冬還。程子謂必再葺以非再葺。

則冬春之交，戍所虛無人矣。

戍者常期過十一月而歸，故至陽月，則家人計日而望之。杕杜亦曰：日月陽止，女心傷止，征夫遑止，是也。憂心孔疚，我行不來，探其室家之情而代之言也。使戍役自言，則爲怠於公義上探其情而代之言，則仁至義盡而愈以作其忠勇之氣矣。三章

次章探行者之情，念其室家，三章因探其室家之情，憂行者之不至，四章則隱然激以大義，曰

彼路斯何，乃君子之車也。君子尙勤於王事，而不得顧其室家，況吾儕乎？我行不來，與豈敢定居，遙相應答。○玃狁遷徙，出沒無常，故曰豈敢定居。

四章

出車

凡師有功，必有錫命策勲之典。召虎之錫祉，吉甫之受祉，是也。采薇一月三捷，出車再舉有功，乃無一語及此，何也？蓋西伯奉簡書以敵愾，商王受旣無錫命，豈敢自策諸臣之勲，故於戍役

則代鳴其哀。於還帥第虛嘉其功。實無錫命策勲之事。可陳述耳。常武無及焉。何也。王親在行。歸告郊廟社稷山川。自有舊典。以播於樂歌。則似自耀其功。非言之體也。采芑則蠻荆不戰而來。威其征伐。獫狁之功。前此矣。事後追叙。亦非體也。

禮凡爲君使者。已受命。君言不宿於家。軍事尤重且急。故旣得君命。遂至於牧。然後命後車裝載以隨行也。若所乘車之僕。則方出于牧之時。

已當命之無俟更召矣。

首章

言主帥所心憂在僕夫之勞病也。戍役之所憂曰。載飢載渴。曰。靡使歸聘。而將帥之所憂則僕夫。况瘁而已。蓋愛其身家者。小人之情也。忘身忘家而獨憂心於僕夫之况瘁。所以撫循曲至。甘苦必同。而能得下之死力與。

次章

南仲爲皇父之太祖。必周初人也。武王克商。周公東征而外。不聞有事於北方。據史記。厲王流彘。然後玁狁內侵。則非武王以後之詩明矣。前

此則大王王季崎嶇邠岐間豈能盛威於玃狁
卽於西戎小有侵伐亦不宜出於王命則爲文
王專征時事無疑也其稱天子及王命皆謂商
王方伯遣將出師自當稱王命以誓戒與秦風
王于興師衛風爲王前驅同義○李鍾僑曰禦
寇莫要于築城留攻則不可卽拔越而過之則
懼攝其後前篇玃狁孔熾非要擊三捷不足以
遏之此篇第城朔方遽云玃狁于襄蓋使知有
脩則不敢更窺所以掃除其氛祲也豈二詩乃

同時所作。獫狁既退，旋興是役。與唐張仁愿築三受降城而

朔方平。宋岳忠武治襄陽城以圖中原。孟珙修之。宋祚爲延者復數十年。三章

薄迫也。漢書薄俱訓迫。戎狄內侵，禦之不可以

少緩。六月之詩曰：我是用急。而曰薄伐，則不得

以聊伐爲義明矣。蓋自鎬涇迫逐至于太原道

經千里，用力不可謂不深矣。周初戎狄本居涇

洛之北，大原故狄土也。春秋傳曰：狄之廣莫於

晉爲都。五章

杕杜

李光地曰觀東山采薇出車皆眷眷於征人道
路之艱辛室家之離別枵杜則並探其父母之
憂思皆聖人所以體天地之心也至宣王諸詩
徒侈其盛威於中國而此意微矣

國風所載婦人思其君子不過室家之情男女
之思而已此詩則曰憂我父母而不及其私則
所見者愈大而所憂者愈切矣以舅姑之憂爲
憂則所以體君子之心而代其子職者可知以
勞還役而及此教孝作忠徬徨周浹非聖人不

能爲此言。

三章

白華之什

南陔白華華黍由庚崇丘由儀

虞書詩言志歌永言聲依永律和聲無辭則聲
無所附不能成樂調孔子既祥十日而成笙歌
笙而曰歌則有辭明矣春秋傳宋公享叔孫婁
賦新宮新宮下管也苟無辭則何以云賦疑未
可以朱子之說易張子也

蓼蕭

藩侯於天子心志稍有不通則君臣相猜其聞

不令會朝之際。下以貌承。上以術馭。其心之艱
虺而不安者多矣。今相見而寫心笑語之。不忌
是以有譽而能安也。首章

宜兄宜弟。就同燕之國而言也。於兄弟婚姻之
國。能講信修睦。事大字小。而無不宜。則篤叙國
中之族屬。不待言矣。能如是。則兵革不試。蒸民
樂業。在已爲令德。而天必報之以壽愷矣。三章

湛露

李鍾儔曰。蓼蕭始相見而燕也。故其意莊。湛露

再三燕而致渥洽也故其情暱